

Edificio Ecury Complex, otro edificio monumental cu ta wordo bishita

ORANJESTAD(AAN)-- Durante di e Paseo, Edificio Ecury Complex, situa riba Schelpstraat # 40-44 y J.G. Emanstraat 14-22 den Oranjestad, tambe ta habri su portanan for di 10'or di mainta mañan.

Informacion di Ecury Complex:

Posibelmente e contactonan cu exterior di e famia Ecury a influencia e apariencia di e edificacionan di Schelpstraat 40 y 42. Merdardo 'Dada' Picus, posibelmente, a diseña Schelpstraat 42. E edificacionan tabata propiedad di famia Ecury. E compania S.N. Ecury, estableci na 1908, tabata importa y exporta bebida y comestibel. E tabata 'dealer' di auto marca Ford y tire di Goodyear y tambe e tabata agencia pa diferente fabricante di frishider y radio. Na 1972 e compania tabata tin un pacus den Nassaustraat (Caya Grandi). Riba e ultimo piso tabata tin e bar/cafe "Roofgarden".

Schelpstraat 40 ('White House'):

A construi e villa aki mas of menos den aña 1910 riba un parcela rectangular. E estilo di e villa, Villa Caribense, ta indica cu e tabata riba inspiracion di ehempel di construccion di Curaçao, di e parti sur di Estado Uni, e parti nort di Latino-America of di otro islanan Caribense. E edificio ta consisti di dos piso. Segun Sra. P. Schouten-Ecury, a construi e edificio den diferente fase. A construi e prome piso den añanan 1917/1918, den e periodo di

e 'Kaboutergriep'. Esaki ta e cas di nos heroe Sr. 'Boy Ecury'.

Schelpstraat 42 ('Green house'):

A construi e cas aki den diferente fase y ta consisti di diferente parti, entre otro; un cas di cunucu, un "herenhuis" di aña 1929 cu un cura y anexo (bijgebouwen). Na banda robes di e "herenhuis" tin un portal bunita, cu ta e entrada pa yega na e parti patras di e cura.

E cas di cunucu a ser construi na fin di 1929 (ca. 1870) den un forma tradicional. E nok di e cas ta core paralelo cu Schelpstraat. E edificio aki, hunto cu Schelpstraat 44 ta e parti mas bieu di e edificacionan Ecury. E edificio tin un parcela rectangular y ta consisti di un parti memey cu na banda un galeria.

Schelpstraat 44 ('Fruteria'):

Na aña 2002 un candela a destrui parti di e fruteria. A construi e cas di cunucu tradicional aki probabelmente na final di siglo 19 (ca. 1867). E entrada pa e cura ta den e muraya na banda west. Louis Rosenberg a construi e cas aki y despues famia Ecury a cumpr'e. E cas di cunucu aki tin un parcela rectangular y ta existi di un parti memey cu na banda un galeria. E ta e parti mas bieu di e edificacionan Ecury.

J.G. Emanstraat 14 ('Tenants House'):

A construi e cas aki rond di 1900 y parcialmente ta traha riba un regenbak. E cas tin un forma rectangular.


J.G. Emanstraat 16-20 ('Tenants House'):

Esaki ta un compleho di tres cas pega na otro, construi rond di 1900. E entidad ta diseña como un cas simpel y traha riba un parcela rectangular y ta consisti di un piso. E edificio ta paralelo cu John G. Emanstraat. Mas laat Sra. Ecury a cumpra e cas aki. Door di su simplicidad y tamaño e ta cuadra cu e caracter historico di e edificacion rondona.

J.G. Emanstraat 22:

E edificio simpel aki tabata traha di palo y tabata limita na e muraya historico na Schelpstraat # 40.

E arkitecto Sr. Bert Kamsteeg di BK Consult N.V. hunto cu su team di su oficina lo duna e recoridonan na Edificio Ecury Complex, durante di e Paseo Monumental IV 2014. Actualmente Museo



Arqueologico Nacional Aruba (MANA) ta ubica den e edificio monumental aki.

Ministerio di Cultura, Oficina di Monumento y Comision Paseo Monumental ta invita henter e pueblo di Aruba y amantenan di monumento pa haci uzo di e oportunidad aki pa participa na e paseo mo-

numental di e aña aki y ban apoya, duna balor na nos cultura y nos herencia cultural y cera conoci cu e tecnica den arkitektura cu a ser uza den nos monumentonan.

Warda e articulo aki y sigur por uza esaki como fuente durante Paseo Monumental IV 2014.